

張復聚

「醫生--ah，我kám-mō(KM)--a！」

「你ná會知影he是KM？」

「我KM幾nā百pái--a，ná會m̄知！」

Tī診所內底，chhiâng-chāi會tú著這款tāi-chì。到底KM是siá<sup>n</sup>-mih？kā你講你的確m̄信：我mā m̄知！普通lán若kan-ta<sup>n</sup>頭痛，lán會kā醫生講頭痛，bē講KM，m̄-koh若koh會流鼻水、chát鼻、ka嗽，lán就會講KM。論真講--起來，lán一般teh講ê KM

iáu有嚨喉痛、骨頭酸痛、疲勞ià-siān，有時mā會發燒、bah-mo kôa<sup>n</sup>，若嚴重--起來，koh會頭殼gông、chhùi-chhìn，hōan-sè koh會péng腹、腹tó痛、làu-sáiii，到chia，lán thang án-ni講：KM是一大堆無相siāng症頭ê總稱呼（a syndrome）。

若án-ni講，到底KM是siá<sup>n</sup>-mih病？醫學講著「病」（disease entity）ê時，lóng是用致病原因來說明、研究kap治療，像Ài-sí病（AIDS）原因是病毒（virus），名叫HIV（Human Immuno-deficiency Virus）。最近lán chia ê 豬災（che）『口蹄疫』mā是病毒，叫做Coxsackie virus。梅毒是細菌（bacteria），號做Treponema pallidum（另外mā有一種「媒毒」是電視、報紙、Radio大眾媒體ê毒）。中風是血壓siu<sup>n</sup> kôan引起血筋破--去，iah是血sng（栓）塞著血管ii。

Chhōe著原因，chiah有法tōr thang治療。照án-ni講，KM ê病母是siá<sup>n</sup>-hòe？醫學課本內底有一個病號做URI（Upper Respiratory Infection，上呼吸道感染），hām lán tú-chiah講ê KM上kài óa意。URI是病毒引去--ê，症頭是頭痛、發燒、流鼻、嚨喉痛、ka嗽ii，kap lán頂頭講--ê真kāng，m̄-koh無siá<sup>n</sup>要緊，準講lán無chhap--i，無食藥á，mā tī一禮拜內會好--去。URI thang講是普通lán講KM ê代名詞；話講倒tng--來，lán mā ài知，kāng款ê症頭無tiā<sup>n</sup>-tiòh是kāng款ê病因，這個sūn niâ（sî-chūn niâ），tiòh-ài詳細區別，chiah bē誤診：

1. 嚨喉痛：KM、細菌、神經痛、過敏，lóng有可能。KM引起--ê，lán tú講--過，無要緊，ka-kī會好。若細菌引起ê Hian-tō-sian發炎『化膿性扁桃腺炎』，tiòh-ài食抗生素14日，若無細菌會去礙著心臟kap腰

子，引起風濕性心臟病kap 急性腎炎，he 就有影「臍歪--a」。神經痛kap 過敏若有對症食藥就好--a。

2.病毒性肝炎（A 型、B 型）、日本腦炎、出麻á『麻疹』、德國癩『德國麻疹』、豬頭肥『腮腺炎』、小兒麻痺i一直到肺炎kap 最近teh hán ê siáu 狗病，tī tú 開始ê 時，mā 是lóng 會有發燒、頭痛、ià-siān ê 症頭，kap KM真相kāng，若無細膩診察，tiā<sup>n</sup>-tiā<sup>n</sup> 會làu-kau--去。

3.急性病毒性腸炎，tī lán chia ê kôa<sup>n</sup>--人lóng 會流行，病毒ê 外形像車lián，我kā 號做「車lián-á 病毒」，chiā<sup>n</sup> pháí<sup>n</sup>，開始ê 時mā ná 像KM，m̄-koh，真緊就會腹tó 痛、làu-sái、吐，若幼嬰á 會致使脫水kap 休克，ài 好禮á 處理，無會出tāi-chì，有可能liān 性命都無--去。

4.有時á KM ê 病毒會礙著大腸ê hát á『淋巴腺』，引起Mesenteric adenitis，正pêng 腹tó ê 下kòeh 會痛，kài 成盲腸炎，有時會hông sak 入去開刀房「剖腹」，he 就有影「有夠soe，種pû-á 生菜瓜」！M̄-tiòh，是種pû-á bē 開花。

Ta<sup>n</sup>，tāk-ê lóng 會hiáu 診斷ê KM soah hō 我講到chiah 複雜，m̄ 知有人會起kiāu--無？無要緊，診斷ê khang-khòe 留hō 醫生，你ê 責任就是kā 症頭講hō 清楚，同時mā 請醫生kā 你ê 心臟、肺部kap 腹tó 聽hō 清楚，án-ni就妥當--a！

Lán chia sī Hau-siâu Kóng-pò-tiān-tâi，chit-má beh lâi siâu-kài chit bī iòh-á。Che sī Kóng-lóng-bô-ia<sup>n</sup>-bô-chiah Chè-iòh-kong-si chhut-sán ê「Bē hó ê iòh-ko」。Bô-lūn lí sí-chôa kā--tiòh、sí-bé that--tiòh、lâu-kha poáh lóh lâu-téng，iah sī khi hō léng-kún-chúi thng--tiòh，chhiá<sup>n</sup> kóa<sup>n</sup>-kín lâi boah「Bē hó ê iòh-ko」。Pau-niá lí liáp-á hó，「lâng」tō bô！Góa sī Ong-lók-á-sian。Beh bé iòh-ko--ê chhiá<sup>n</sup> khà tiān-ōe「Sam sam pat pat it tit giú」，gōa p̄-thâu--ê ài ē kì-tit「khòng káu-ka」，m̄ sī，sī「khòng káu ka--lòh」。Chài-hōe！